

Flurina Badel tinnitus tropic poesias

editionmevinapuorger



Il prüm cudesch da poesias da Flurina Badel. FOTO EDITIONMEVINAPUORGER

Flurina Badel da Guarda rapreschainta la generaziun giuvna d'auturas ladinas.

FOTO J. SARBACH

Pleds cun ün cling modern

Flurina Badel e las poesias spessas

DAD ANNATINA FILLI / ANR

■ **In dumengia ha gnö lö la vernissascha dal prüm cudesch da poesias da Flurina Badel da Guarda. Ella rapreschainta la generaziun giuvna d'auturas ladinas.** L'autura *Flurina Badel* e l'editura *Mevina Puorger* han invità in dumengia i'l Center d'art contemporana Nairs a Scuol a la vernissascha dal cudesch da poesias «tinnitus tropic». Las 49 poesias sun segmentadas in set parts e vegnan cumpletadas cun ün pled da finischiun da l'editura. Badel giova culs pleds e tils dà ün cling modern. Ella banduna las vias, ils stizis e'ls truos da la poesia feminina in Engiadina.

La metamorfosa da la poesia

La terza poesia dal prüm cudesch da poesias da Badel es dedicada al tinnitus tro-

pic ed ha procurà cun quai pel titel dal cudesch. «La poesia svesa tratta d'ün uschè chi chanta e chi significha per mai üna metafra per la poesia», ha declarà Badel. Il tinnitus es, tenor ella, alch chi vain nanpro, chi tschübla, chi resta in l'uraglia e chi nu's rabla plü davent uschè svelta. «Tropic significha alch ester, il tun es condensà ed es ün pled ester chi procura qua o là per irritaziuns», uschè l'autura valladra. Ella es da l'avis cha eir hoz as poja amo adüna metter in dumonda quai chi'd es incuntschaint e «quai adonta chi's craja da cugnuscher fingià tuot». «Per mai sto esser üna poesia alch chi'd es spess sco'l tinnitus ed alch chi intimescha da tuornar adüna darcheu a far ponderaziuns.» La poesia douvra per Badel eir ün element ester. Tuot quistas ingredienzas procuran per tensiun e lachan nascher sias poesias. «Eu prouv da

crear cun pacs pleds üna tensiun, eir pel lectur.»

Vienna e la raccolta da poesias

Flurina Badel es nada a Lavin e creschüda sü tanter oter a Guarda. Davo il gimnasi a l'Institut Otalpin a Ftan ha la fat la scolaziun da schurnalissim ed ha lavurà sco moderatura e cineasta libra. Daspö l'on 2014 es sia professiun principala la lavur artistica i'l duo Badel e Sarbach, quai davovair frequenta la Scuola d'art a Basilea. Il duo chi abita hoz a Guarda expuona sün tuot il muond. L'artista ed autura publichescha eir agens texts litterars, ch'ella scriva in vallader e per part in tudaich. Dürant ils ons 2017 e 2018 es Badel statta studenta ospitanta a l'Institut per art litterara da l'Università d'art applichada a Vienna. Quist soggiorn es d'vantà la basa per las poesias da la raccolta «tin-

nitus tropic». «I'l 'Cafè Korb', ün café tradiziunal viennais, n'haja mincha bunura scrit d'ürant duos uras vi da las poesias», uschè Badel. La visita i'l café d'eira d'vantada üna sort da ritual e'ls impiegats e'ls ulteriurs visitaders fuormaivan insembel cun ella üna cumünanza. «Quista constellaziun ha procurà pro mai per la disciplina bsögnaiva da star vi da mias poesias.»

«Üna lingua poetica cun novs orizonts»

In seis pled da finischiun «poesia insistenta – poesia persvadenta» descriva Puorger la particularità da las poesias da Badel. L'autura da Guarda vaiva s'annunzchada davent da Vienna pro l'editura Puorger. «Nus nu'ns cugnuschaivan avant», ha manzunà l'editura, e: «Nus vain decis d'inchaminar insembel la via per edir seis prüm cudesch da poesias.»

Per Puorger esa stat üna bell'esperienza ed ün grond privilegi da pudair collavurar cun ün'autura giuvna da l'Engiadina. «Flurina Badel ha üna lingua poetica chi chatta novs orizonts: Id es üna lingua chi reflecta per part la lingua da sia generaziun, cun expressiuns novvas, impraists o aignas creaziuns», uschè l'interpretaziun da Puorger. Plünavant es ella da l'avis cha la poesia haja il privilegi da pudair restar misteriusa e zoppar per dal bun ün ultim minz d'inclotta. Las poesias da Badel nu su be misteriusas. Ellas restan in l'uraglia e l'üna o l'otra eir per plü lung temp in procurond per ponderaziuns ed impissamaints davart il sen zoppà da la poesia.

Il cudesch «tinnitus tropic» po gnir cumprà pro la Lia Rumantscha a Cuoira (tel. 081 258 32 22, www.liarumantscha.ch) obain in tuot las librerias chi furnischan cudeschs rumantschs.

31 stipendis in Engiadina e Val Müstair

La Fundaziun Pestalozzi sustegna regiuns muntagnardas

DA FLURIN ANDRY / ANR

■ **Cun stipendis pussibilescha la Fundaziun Pestalozzi a giuvenils da regiuns muntagnardas e periferas d'imprender utrò ün manster o frequentar üna scoula.** Urs Kühne es d'vantà la persuna da confidenza pella Val Müstair. Sch'ün giuvenil d'üna Val periferica, sco p. ex. la Val Müstair o la Val Schons, less imprendere ün manster ün pa plü insolit, frequentar üna scoula media o far ün stüdi sto'l bandunar sia Val. El sto ir utrò e quai es collià cun cuosts considerabels per scolaziun, ma eir per abitar e mangiar. Per pussibilitar als giuvenils da far quai es gnüda fundada da l'on 1961 la Fundaziun Pestalozzi (FP). «Cun bürocrazia minimala sustegna ella minch'on darcheu ad oters giuvenils da regiuns periferas in Svizra», declera *Curdin Linsel*, inspectur da scoula pel territori ladin, «là ingio cha'l man public nu tendscha.» El es persuna da confidenza e da contact da la FP per l'Engiadina e Samignun.

I'ls chantuns Grischun, Vallais e Tessin

«Grazcha al sustegn da la FP han pudü gnir accumulats blers sömmis da mansters da giuvenilas e giuvenils in tuot las regiuns periferas da las Alps svizras», ha cuntinuà l'inspectur. Dürant l'on 2018 ha la fundaziun cun centrala a Turich sustgnü in tuot la Svizra a 310 giuvenils. «Ils plü blers stipendis da la FP, nempe 122, sun rivats in Grischun, 56 sun its



L'inspectur da scoula Urs Kühne chi abita a Sta. Maria es pella Val Müstair la nova persuna da confidenza e da contact da la Fundaziun Pestalozzi.

giò'l Vallais e 27 giò'l Tessin», ha comunicà Linsel. Sco ch'el ha agiut han eir singuls giuvenils dad oters chantuns chi accumulivan ils criteris survgni imports finansials da la FP. «Illa regiun Engiadina-Val Müstair sun gnüts concess l'on scuors 31 stipendis», ha l'infuormà e dit ch'in media hajan els minch'on üna vainchina da dumondas per sustegn finanziel in Engiadina ed üna deschina da dumondas illa Val Müstair.

Claudio Gustin ha surdat la bachetta ad Urs Kühne

Dürant 56 ons es l'antierur inspectur da scoula *Claudio Gustin* da Sta. Maria stat la persuna da confidenza da la FP pella Val Müstair. D'incuort ha el surdat quista funcziun ad *Urs Kühne*. Eir quel es inspectur da scoula i'l district Engiadina, Samignun e Val Müstair. Kühne es creschü sü i'l Sangallais. Cun 24 ons es el i in Val Müstair a dar scoula secundara. Qua ha'l imprais rumantsch. Dürant trais ons ha el chi abita cun sia famiglia a Sta. Maria manà la scoula in Val Müstair. Daspö il 2012 lavura'l per l'inspectorat da scoula grischun cun ün pensum dad 80 pertschient ed instruischa sül s-chalin ot fusiunà a Sta. Maria inglais. «Causa ch'im para fich important cha'ls giuvenils da regiuns periferas sco nossa hajan la pussibilità da dumandar sustegn finanziel per far la scolaziun professiunala utrò suna jent stat pront da surtour quista carica e d'vantà persuna da confidenza e contact da la FP», ha dit Kühne.

La persuna da contact da la Fundaziun Pestalozzi per l'Engiadina es *Curdin Linsel* (081 257 58 50) e pella Val Müstair *Urs Kühne*, *Mundattaschas*, 7536 Sta. Maria, 079 415 12 98 / 081 257 58 50. Ulteriuras infuormaziuns www.pestalozzi-stiftung.ch

Manadra oriunda da la Val Schons

La direcziun da la Fundaziun Pestalozzi ha *Daniel Zeller*, üna persuna experta per economia.

Manadra da gestiun da la FP es daspö l'on 2012 *Erika Andrea* chi'd es da lingua rumantscha. «Eu sun creschüda sü a Pignia illa Val Schons ingio chi'd es bod adüna da bandunar la Val per far ün giarsunadi o frequentar üna scoula», disch ella, «perquai n'haja inclotta pels bsögns da giuventüna chi deriva da familias chi abitan in regiuns muntagnardas e periferas e less sustgnair als giuvenils per tils pussibilitar üna buna scolaziun professiunala.»

La FP es activa in tuot las parts da la Svizra ed i vain comunicà in tuot las quatter linguas. Andrea loda la buna collavuraziun cullas persunas da confidenza da la fundaziun, sco *Curdin Linsel* per l'Engiadina e nov *Urs Kühne* pella Val Müstair.